



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

STATISTIK GUNA TENAGA, MALAYSIA SUKU TAHUN PERTAMA 2025

Permintaan buruh Malaysia terus berkembang sebanyak 1.4 peratus pada ST1 2025, mencatatkan 9.06 juta jawatan

PUTRAJAYA, 15 MEI 2025 – Permintaan buruh Malaysia terus berkembang sebanyak 1.4 peratus pada ST1 2025, mencatatkan 9.06 juta jawatan, Jabatan Perangkaan Malaysia (DOSM) melaporkan dalam penerbitan **Statistik Guna Tenaga, Suku Tahun Pertama 2025** pada hari ini. Statistik yang diterbitkan dalam laporan ini adalah berdasarkan Survei Guna Tenaga yang dilaksanakan ke atas syarikat perniagaan berdaftar dalam sektor swasta. Laporan ini membentangkan statistik permintaan buruh merangkumi indikator bilangan jawatan, jawatan diisi, kekosongan jawatan dan pewujudan jawatan mengikut kategori kemahiran dan aktiviti ekonomi.

Mengulas mengenai sebaran pada hari ini, Ketua Perangkawan Malaysia, Dato' Sri Dr. Mohd Uzir Mahidin berkata, "Bilangan jawatan meningkat sebanyak 1.4 peratus atau bersamaan dengan 127.0 ribu pada suku pertama 2025 mencatatkan 9.06 juta jawatan berbanding suku yang sama tahun lalu (ST1 2024: 8.94 juta). Ini sejajar dengan prestasi ekonomi semasa di Malaysia yang diunjur terus bertambah baik, disokong oleh permintaan dalam negara yang berdaya tahan. Daripada jumlah jawatan, sebanyak 97.9 peratus jawatan telah diisi manakala 2.1 peratus masih kosong."

Dato' Sri Dr. Mohd Uzir Mahidin turut menyatakan bahawa bilangan jawatan diisi meningkat sebanyak 1.4 peratus tahun ke tahun, mencecah 8.87 juta jawatan pada suku tahun ini berbanding 8.75 juta pada ST1 2024. Semua sektor menyumbang secara positif kepada pertumbuhan keseluruhan jawatan diisi di mana sektor Perkhidmatan mendahului dengan pertumbuhan tertinggi sebanyak 1.8 peratus. Ini diikuti oleh sektor Pembuatan dan Pembinaan masing-masing pada kadar 1.5 peratus dan 0.5 peratus. Pecahan jawatan diisi mengikut aktiviti ekonomi menunjukkan sektor Perkhidmatan mendominasi dengan 52.8 peratus atau bersamaan dengan 4.69 juta jawatan, diikuti oleh sektor Pembuatan dengan 26.9 peratus (2.38 juta jawatan)

mengatasi sektor Pembinaan (14.1%; 1.25 juta). Dari segi pecahan mengikut kategori kemahiran, majoriti jawatan diisi adalah dalam kategori separuh mahir dengan 5.55 juta jawatan diisi, mewakili 62.5 peratus daripada jumlah keseluruhan. Ini diikuti oleh kategori mahir merangkumi 2.23 juta jawatan diisi (25.2%) dan berkemahiran rendah yang mencatatkan 1.09 juta jawatan diisi (12.3%).

Menjelaskan secara terperinci mengenai situasi permintaan buruh semasa, Ketua Perangkawan menyatakan, “Kekosongan jawatan pada suku tahun ini meningkat sebanyak 1.2 peratus tahun ke tahun kepada 194.1 ribu, meningkat daripada 191.9 ribu pada ST1 2024. Melihat kepada pecahan aktiviti ekonomi, sektor Pembuatan mengekalkan kedudukannya sebagai pemacu utama dalam kekosongan jawatan dengan 57.3 peratus terutamanya dalam subsektor Produk Elektrik, elektronik dan optikal (33.9 ribu), diikuti oleh Produk petroleum, kimia, getah dan plastik (20.2 ribu). Seterusnya, sektor Pertanian dan Pembinaan masing-masing mencatatkan 31.8 ribu (16.4%) dan 25.4 ribu (13.1%) kekosongan. Dari segi pecahan kekosongan jawatan mengikut kategori kemahiran pula, kategori separuh mahir menyumbang peratus sumbangan terbesar iaitu sebanyak 56.3 peratus (109.2 ribu). Sementara itu, kategori mahir dan berkemahiran rendah masing-masing mencatatkan 24.4 peratus (47.4 ribu) dan 19.3 peratus (37.5 ribu).

Beralih kepada prestasi pewujudan jawatan, sejumlah 33.2 ribu jawatan baharu diwujudkan, meningkat daripada 32.1 ribu pada suku sama tahun sebelumnya, menunjukkan peningkatan tahun ke tahun sebanyak 3.4 peratus. Peningkatan pewujudan jawatan khususnya dalam kategori mahir dan separuh mahir mampu menggalakkan individu untuk melanjutkan pelajaran ke peringkat yang lebih tinggi dan mengikuti latihan khusus, seterusnya membina tenaga kerja yang berkemahiran dan berinovasi. Analisis mengikut kategori kemahiran, kategori separuh mahir menjadi penyumbang terbesar kepada pewujudan jawatan dengan 62.5 peratus (20.8 ribu), diikuti oleh kategori mahir (26.9%; 8.9 ribu) dan berkemahiran rendah (10.6%; 3.5 ribu). Melihat kepada prestasi mengikut aktiviti ekonomi, sektor Perkhidmatan merupakan penyumbang utama dengan 16.0 ribu jawatan baharu diwujudkan (48.1%), dipacu oleh subsektor Perdagangan borong dan runcit dengan 8.8 ribu pewujudan jawatan. Sementara itu, sektor Pembuatan mencatatkan 12.1 ribu jawatan baharu (36.5%) tertumpu dalam subsektor Produk elektrik, elektronik dan optikal, yang mewujudkan 4.2 ribu jawatan baharu. Sementara itu, sektor Pembinaan mencatatkan sejumlah 3.6 ribu jawatan (10.8%).”

Merumuskan kenyataannya, Dato’ Sri Dr. Mohd Uzir Mahidin menyatakan bahawa permintaan buruh di Malaysia berada pada landasan pertumbuhan yang stabil, sekali gus mengukuhkan aspirasi negara untuk memperkukuh asas ekonomi dan mencapai pertumbuhan yang mampan. Beliau turut menyatakan bahawa sektor Pembuatan memainkan peranan penting dalam mendorong pertumbuhan permintaan buruh seperti yang dinyatakan dalam Statistik Pembuatan Bulanan, yang melaporkan peningkatan 1.1 peratus tahun ke tahun bagi bilangan pekerja dalam sektor tersebut.

Trend ini selari dengan matlamat Pelan Induk Perindustrian Baharu 2030 (NIMP 2030) yang bertujuan merancakkan pertumbuhan jawatan dan memperkasa keupayaan tenaga kerja dalam sektor Pembuatan. Permintaan buruh yang semakin meningkat di Malaysia mencerminkan kemajuan ketara dalam pelbagai industri utama, bukan sahaja memenuhi keperluan jawatan semasa tetapi juga mempersiapkan tenaga kerja untuk cemerlang dalam ekonomi global yang kompetitif.


Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia julung kalinya berjaya menduduki tempat pertama di peringkat global di dalam laporan dwitahunan *Open Data Inventory* (ODIN) 2024/25 dikeluarkan oleh *Open Data Watch* (ODW) dengan mengatasi 198 buah negara yang lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.


Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.


Carta 1: Jawatan, Kadar Jawatan Diisi dan Kadar Kekosongan, ST1 2022 – ST1 2025




Carta 2: Pewujudan Jawatan, ST1 2022 – ST1 2025



Carta 3: Permintaan Buruh mengikut Aktiviti Ekonomi, ST1 2025
(% Sumbangan)



Paparan 1: Permintaan Buruh mengikut Kategori Kemahiran, ST1 2025
(% Sumbangan)



Dikeluarkan oleh:

PEJABAT KETUA PERANGKAWAN MALAYSIA
JABATAN PERANGKAAN MALAYSIA
15 MEI 2025